



جابتن حال إحوال اِكْلام إِسلام قولواو قِينخ
JABATAN HAL EHWAL AGAMA ISLAM PULAU PINANG



TEKS KHUTBAH
**GURU BERHIKMAH,
MEMBINA INSAN SEJAHTERA**



Tarikh Bacaan:
15 MEI 2026M / 27 ZULKAEDAH 1447H

Dibiayai :



MAJLIS AGAMA ISLAM
NEGERI PULAU PINANG

Diterbitkan :



JABATAN HAL EHWAL AGAMA ISLAM
PULAU PINANG

***Jawatankuasa
Panel Semakan Teks Khutbah
Negeri Pulau Pinang***

- 1. Sahibus Samahah Prof. Madya Dato' Dr. Mohd Sukki bin Othman (Pengerusi)**
Mufti Kerajaan Negeri Pulau Pinang
- 2. YBhg. Ustaz Muhammad Fadzil bin Alias**
Pengarah, Yayasan Dakwah Islamiyah (YADIM) Pulau Pinang
- 3. YBhg. Ustaz Ahmad bin Hashim**
Mantan Penasihat, Pusat Pengajian Tahfiz Al-Quran (PPTQ)
Kolej Islam Teknologi Antarabangsa Pulau Pinang (KITAB)
- 4. YBhg. Ustaz Subki bin Mohamed**
Mantan Pensyarah Kanan, IPG Kampus Tuanku Bainun
- 5. YBrs. Dr. Mohamad Zaki bin Hj Abdul Halim**
Penolong Mufti, Bahagian Fatwa,
Jabatan Mufti Negeri Negeri Pulau Pinang
- 6. YBhg. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 7. YBhg. Ustaz Ahmad Shahimi bin Senawi**
Pendakwah
- 8. Ustaz Mohd Hanif bin Omar @ Wahab (Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)



Guru Berhikmah, Membina Insan Sejahtera

Khutbah Hari Guru (KPM)

15 Mei 2026M/ 27 Zulkaedah 1447H

الْحَمْدُ لِلَّهِ الْقَائِلِ: يُؤْتِي الْحِكْمَةَ مَنْ يَشَاءُ وَمَنْ يُؤْتَ الْحِكْمَةَ فَقَدْ أُوتِيَ خَيْرًا كَثِيرًا
وَمَا يَذَّكَّرُ إِلَّا أُولُو الْأَلْبَابِ ﴿٣٦٩﴾ سورة البقرة

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.
اللَّهُمَّ صَلِّ وَسَلِّمْ عَلَى نَبِيِّنَا مُحَمَّدٍ وَعَلَى آلِهِ وَصَحْبِهِ وَمَنْ دَعَا بِدَعْوَتِهِ إِلَى يَوْمِ
الدِّينِ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ أَوْصِيكُمْ وَنَفْسِي بِتَقْوَى اللَّهِ وَطَاعَتِهِ
لَعَلَّكُمْ تَفْلِحُونَ.

MUSLIMIN RAHIMAKUMULLAH,

Marilah kita meningkatkan ketakwaan kepada Allah *سُبْحَانَهُ وَتَعَالَى* dengan sebenar-benar takwa, melaksanakan segala perintah-Nya dan meninggalkan segala larangan-Nya. Ketakwaan itulah asas kesejahteraan hidup di dunia dan di akhirat.

Khatib juga mengingatkan sidang jemaah sekalian agar memberikan sepenuh perhatian kepada khutbah yang disampaikan. Elakkan daripada berbual, bermain telefon bimbit atau melakukan perkara yang boleh menghilangkan pahala mendengar khutbah, agar peringatan yang disampaikan meresap ke dalam hati.



Pada hari yang mulia ini, mimbar Jumaat mengajak kita merenungi satu tema penting dalam pembinaan insan dan masa depan negara, iaitu **“Guru Berhikmah, Membina Insan Sejahtera”**.

SIDANG JUMAAT YANG DIRAHMATI ALLAH سُبْحَانَهُ وَتَعَالَى,

Islam memandang pendidikan sebagai amanah besar dan guru sebagai insan yang memikul tanggungjawab membimbing akal, membina jiwa dan membentuk akhlak. Kesejahteraan insan tidak lahir secara spontan, tetapi dibina melalui didikan yang berhikmah dan berterusan.

Firman Allah سُبْحَانَهُ وَتَعَالَى dalam surah al-Baqarah ayat 269 yang dibacakan khatib pada permulaan khutbah yang bermaksud:

“Dia (Allah) memberikan hikmah (kebijaksanaan) atau ilmu yang berguna kepada sesiapa yang dikehendaki-Nya. Maka, sesungguhnya sesiapa yang diberi hikmah itu dia benar-benar telah mendapat kurnia yang banyak. Dan tidak ada yang dapat mengambil pengajaran daripada firman Allah kecuali orang yang berakal dan tulus.”

Ayat ini menjelaskan bahawa hikmah adalah kurniaan agung daripada Allah. Guru yang berhikmah bukan sekadar menyampaikan ilmu, tetapi memiliki kemahiran mendidik dengan kebijaksanaan agar ilmu dapat membina insan dan masyarakat yang sejahtera.

SIDANG JUMAAT SEKALIAN,

Kesejahteraan insan tidak hanya diukur dengan kecemerlangan akademik, tetapi dengan keseimbangan akal, emosi, akhlak dan hubungan sosial. Pelaksanaan Rancangan Pendidikan Malaysia (RPM)

2026-2035 yang diperkenalkan adalah merupakan pelan strategik satu dekad dengan memberi tumpuan kepada mutu, akses, ekuiti, ketersediaan sumber dan kemampuan.

Kementerian Pendidikan turut mengambil inisiatif dengan memperkenalkan kurikulum persekolahan tahun 2027 bertujuan untuk melahirkan insan sejahtera yang seimbang dalam semua aspek kehidupan, membudayakan pembelajaran sepanjang hayat serta memupuk perpaduan dan hubungan sosial yang harmoni. Kurikulum ini juga bermatlamat membentuk warganegara yang beradab, bertanggungjawab, dan berdaya saing di peringkat antarabangsa.

Namun begitu, realitinya di sekolah hari ini masih wujud cabaran seperti pelajar yang lemah adab, ilmu dan disiplin, ketagihan gajet sehingga menjejaskan fokus pembelajaran, kes buli dan kurang empati sesama rakan serta tekanan emosi yang tidak diurus dengan baik. Bagi mengatasi keadaan ini, sistem pendidikan perlu diperkukuh secara menyeluruh melalui pembinaan akidah, akhlak dan kesejahteraan emosi dalam pengajaran dan pembelajaran serta memperkasa guru sebagai murabbi yang membimbing dengan hikmah. Eratkan juga kerjasama antara sekolah dan ibu bapa, di samping mewujudkan persekitaran sekolah yang subur dengan nilai hormat, kasih sayang dan tanggungjawab agar hasrat melahirkan insan sejahtera benar-benar tercapai.

Di sinilah peranan guru yang amat besar dalam menyatukan ilmu dan adab. Rasulullah ﷺ bersabda:

إِنَّمَا بُعِثْتُ مُعَلِّمًا

Yang bermaksud: “Sesungguhnya aku diutuskan sebagai seorang pendidik.”
(Hadis riwayat Ibn Majah)

Di sebalik lahirnya insan berilmu dan berakhlak mulia, berdirinya seorang guru yang ikhlas mendidik dan membimbing. Guru bukan sekadar menyampaikan pelajaran, tetapi merupakan pembina sahsiah dan pembentuk karakter insani.

Rasulullah ﷺ merupakan Muallim yang agung. Baginda mendidik para sahabat bukan dengan kekerasan, tetapi dengan akhlak yang luhur, kesabaran dan kebijaksanaan sehingga lahir generasi terbaik. Rasulullah ﷺ membetulkan kesalahan tanpa memalukan, menegur tanpa merendahkan, dan mendidik tanpa mematahkan jiwa. Inilah didikan berhikmah yang melahirkan manusia sejahtera di dunia dan akhirat. Allah ﷻ berfirman dalam surah al-Jumu'ah ayat 2:

هُوَ الَّذِي بَعَثَ فِي الْأُمِّيِّينَ رَسُولًا مِّنْهُمْ يَتْلُوا عَلَيْهِمْ آيَاتِهِ وَيُزَكِّيهِمْ وَيُعَلِّمُهُمُ

الْكِتَابَ وَالْحِكْمَةَ وَإِن كَانُوا مِن قَبْلُ لَفِي ضَلَالٍ مُّبِينٍ ﴿٢﴾

“Dialah yang mengutuskan dalam kalangan orang (Arab) yang buta huruf seorang Rasul (Muhammad) daripada bangsa mereka sendiri, yang membacakan kepada mereka ayat-ayat-Nya, menyucikan mereka (daripada akidah yang sesat), dan mengajarkan mereka Kitab (al-Quran) dan hikmah. Sesungguhnya mereka sebelum (kedatangan Muhammad) berada dalam kesesatan yang nyata”.

SIDANG JUMAAT YANG DIKASIHI ALLAH ﷻ,

Banyak masalah sosial hari ini seperti kekerasan emosi dan kerosakan hubungan sesama manusia bukan berpunca daripada ketiadaan peraturan, tetapi berpunca daripada kegagalan membina hikmah dan empati dalam jiwa. Allah سُبْحَانَهُ وَتَعَالَى mengingatkan dalam surah al-Baqarah ayat 190:

..... وَلَا تَعْتَدُوا إِنَّ اللَّهَ لَا يُحِبُّ الْمُعْتَدِينَ ﴿١٩٠﴾

Maksudnya: “(Tetapi) janganlah kamu melampaui batas. Sesungguhnya Allah tidak menyukai orang yang melampaui batas.”

Orang yang berhikmah akan berfikir secara rasional dan bertindak dengan tidak melampaui batas dalam perkataan, perbuatan dan sikap. Oleh itu, guru yang berhikmah hendaklah sentiasa mengawal emosi, membina adab dalam berkomunikasi dan menjaga hubungan sesama manusia. Rasulullah صَلَّى اللَّهُ عَلَيْهِ وَسَلَّمَ bersabda:

إِنَّ الرِّفْقَ لَا يَكُونُ فِي شَيْءٍ إِلَّا زَانَهُ

Maksudnya: “Sesungguhnya sikap lemah lembut tidak ada pada sesuatu melainkan ia akan menghiasinya (menjadikannya indah).”

(Hadis riwayat Muslim)

SIDANG JUMAAT YANG DIRAHMATI ALLAH سُبْحَانَهُ وَتَعَالَى,

Mengakhiri khutbah pada hari ini, khatib ingin menyampaikan beberapa pesanan:

Pertama: Mencontohi Rasulullah صَلَّى اللهُ عَلَيْهِ وَسَلَّمَ sebagai guru yang agung.

Baginda mendidik dengan hikmah, lemah lembut, penuh kasih sayang dan tidak memalukan sesiapa. Jadikan sunnah Baginda sebagai model dalam mendidik anak dan masyarakat.

Kedua: Menghormati dan memuliakan guru sebagai pewaris tugas para nabi. Guru menyampaikan ilmu, membentuk akhlak dan membina masa depan ummah. Menghormati dan memuliakan guru adalah tanda kita mensyukuri nikmat ilmu.

Ketiga: Bersatu membina generasi berilmu dan berakhlak melalui pendidikan berhikmah. Ibu bapa, guru, masyarakat dan pihak berwajib hendaklah bekerjasama memupuk adab, akhlak, empati dan tanggungjawab demi melahirkan insan sejahtera di dunia dan akhirat.

Firman Allah سُبحَانَهُ وَتَعَالَى dalam surah al-Nahl ayat 125:

أَدْعُ إِلَى سَبِيلِ رَبِّكَ بِالْحِكْمَةِ وَالْمَوْعِظَةِ الْحَسَنَةِ وَجَدِلْهُمْ بِالَّتِي هِيَ أَحْسَنُ إِنَّ

رَبَّكَ هُوَ أَعْلَمُ بِمَنْ ضَلَّ عَنْ سَبِيلِهِ وَهُوَ أَعْلَمُ بِالْمُهْتَدِينَ ﴿١٢٥﴾

Maksudnya: “Serulah ke jalan Tuhan kamu (wahai Muhammad) dengan hikmah dan nasihat pengajaran yang baik, dan berbahaslah dengan mereka (yang kamu serukan itu) dengan cara yang lebih baik. Sesungguhnya Tuhan kamu, Dialah yang lebih mengetahui tentang sesiapa yang tersesat daripada jalan-Nya dan Dialah yang lebih mengetahui orang yang mendapat hidayah petunjuk”.

بَارَكَ اللهُ لِي وَلَكُمْ بِالْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ
الْحَكِيمِ، وَتَقَبَّلَ اللهُ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا،
وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ
وَالْمُؤْمِنَاتِ، الْأَحْيَاءِ مِنْهُمْ وَالْأَمْوَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.



Khutbah Kedua

2026M/1447H

الْحَمْدُ لِلَّهِ رَبِّ الْعَالَمِينَ، وَالصَّلَاةُ وَالسَّلَامُ عَلَى سَيِّدِنَا مُحَمَّدٍ النَّبِيِّ الْأَمِينِ،
وَعَلَى آلِهِ وَأَصْحَابِهِ وَالتَّابِعِينَ، وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، لَهُ الْمُلْكُ وَلَهُ الْحَمْدُ يُحْيِي وَيُمِيتُ
وَهُوَ عَلَى كُلِّ شَيْءٍ قَدِيرٌ، وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى سِرَاجٍ مُنِيرٍ.

صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِنَةَ عَرْشِهِ وَمِدَادَ كَلِمَاتِهِ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ.

MUSLIMIN YANG DIRAHMATI ALLAH,

Mesyuarat Khas Jawatankuasa Fatwa Negeri Pulau Pinang Bil. 2/2021 memutuskan bahawa pernikahan seorang perempuan di luar negara tanpa pengetahuan dan persetujuan wali adalah fasid, dan kesahihannya bergantung kepada persetujuan wali sekiranya perempuan tersebut sengaja melarikan diri serta tidak memenuhi syarat wali ghaib atau wali enggan.

Namun, jika perkahwinan dilakukan kerana wali enggan tanpa alasan munasabah, lalu pasangan berkahwin menggunakan wali hakim di tempat lain melebihi dua marhalah dengan memenuhi syarat-syarat yang ditetapkan, maka perkahwinan tersebut adalah sah menurut pandangan yang muktabar.

Di samping itu, bersempena sepuluh awal Zulhijjah yang bakal menjelang, marilah kita mendekatkan diri kepada Allah SWT dengan memperbanyakkan zikir, takbir, tahmid serta amalan-amalan soleh.

Rebutlah peluang hari-hari mulia ini dengan berpuasa, khususnya pada Hari Arafah bagi mereka yang tidak menunaikan haji, memperbanyakkan bacaan al-Quran, bersedekah, berdoa dan istighfar serta memohon keampunan Allah dengan hati yang penuh tunduk dan pengharapan.

Bagi orang yang akan melaksanakan korban, disunatkan untuk tidak memotong kuku dan bulu di badannya bermula 1 Zulhijjah sehingga ibadat korban dilaksanakan.

قَالَ اللَّهُ تَعَالَى: إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا.

اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ.
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ،

اللَّهُمَّ أَعِزِّ الْإِسْلَامَ وَالْمُسْلِمِينَ، وَدَمِّرْ أَعْدَاءَكَ أَعْدَاءَ الدِّينِ وَأَنْصُرْ مَنْ نَصَرَ
الدِّينَ، وَاخْذُلْ مَنْ خَذَلَ الْمُسْلِمِينَ، وَأَعْلِلْ كَلِمَتَكَ إِلَى يَوْمِ الدِّينِ.

اللَّهُمَّ أَنْصُرْ إِخْوَانَنَا الْمُسْلِمِينَ وَالْمُجَاهِدِينَ وَالْمُسْتَضْعَفِينَ فِي فَلَسْطِينَ وَفِي كُلِّ
مَكَانٍ، وَفِي كُلِّ زَمَانٍ، بِرَحْمَتِكَ يَا أَرْحَمَ الرَّاحِمِينَ.

اللَّهُمَّ أَصْلِحْ أَيْمَتَنَا وَوُلَاةَ أُمُورِنَا، وَاجْعَلْ وِلَايَتَنَا فِيْمَنْ خَافَكَ وَاتَّقَاكَ يَا رَبَّ
الْعَالَمِينَ. اللَّهُمَّ اجْعَلْ بَلَدَنَا مَالِيزِيَا حُصُوصًا وَوَلَايَةً قُولاو فَيَنْعَ آمِنًا مُطْمَئِنًّا
سَخَاءَ رَحَاءٍ، دَارَ عَدْلِ وَإِيْمَانٍ، وَأَمْنٍ وَأَمَانٍ، يَا ذَا الْفَضْلِ وَالْإِحْسَانِ.

اللَّهُمَّ وَفَّقْ قَادَتَنَا وَرُعَمَاءَنَا وَوَلَاةَ أُمُورِنَا لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ
اجْعَلْهُمْ هُدَاةً مُهْتَدِينَ صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى
صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan
Agong, Sultan Ibrahim dan Kebawah Duli Yang Maha Mulia Seri Paduka
Baginda Raja Permaisuri Agong, Raja Zarith Sofiah.

وَكَذَلِكَ صَاحِبِ الْفَخَامَةِ،

Tuan Yang Terutama Tun Dato' Seri Utama Haji Ramli bin Ngah Talib,
Yang di-Pertua Negeri Pulau Pinang dan Yang Mulia Toh Puan Raja Dato'
Seri Utama Noora Ashikin binti Raja Abdullah.

“Ya Allah! Dengan sifat-Mu yang Maha Pemurah dan Maha Penyayang;
Jadikanlah kami dan keturunan kami orang yang istiqamah mendirikan
solat secara berjemaah, mengeluarkan zakat melalui Zakat MAINPP dan
melaksanakan waqaf melalui Wakaf MAINPP.

Rahmatilah jua para pembayar zakat dan pewakaf sekalian, serta
berkatilah usaha Kerajaan Negeri melalui Majlis Agama Islam Negeri
Pulau Pinang (MAINPP) dalam usaha mewujudkan keseimbangan sosio-
ekonomi ummah di negeri yang tercinta ini.”

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.
عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ. فَادْكُرُوا اللَّهَ الْعَظِيمَ يَذْكُرْكُمْ، وَاشْكُرُوهُ
عَلَىٰ نِعَمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ وَلَذِكْرُ اللَّهِ أَكْبَرُ وَاللَّهُ يَعْلَمُ مَا
تَصْنَعُونَ.



جابتن حال إحوال اكمام إسلام قولواو فینخ
JABATAN HAL EHWAL AGAMA ISLAM PULAU PINANG